




... Pendidikan & Latihan



PROF Dr Juhary (kiri) dan Prof Dr Akwi Hassan sentiasa memastikan program ditawarkan relevan dengan keperluan semasa.

Mahir urus organisasi, modal insan

■ SAHUSS AeU perkenal program Sarjana Pengurusan Pengetahuan pada 2009

Oleh Rosyahaida Abdullah
rosyahaida@medaprima.com.my

Menyedari kepentingan pengurusan pengetahuan sebagai pemangkin pembangunan sesebuah organisasi atau negara, Pusat Pengajian Sastera, Kemanusiaan dan Sains Sosial (SAHUSS) Asia e Learning (AeU) memperkenalkan program Sarjana Pengurusan Pengetahuan pada 2009.

Istilah Pengurusan Pengetahuan mungkin subjek yang baru di Malaysia, namun ia sudah diberi perhatian khusus oleh ilmuwan serata dunia sejak lewat 1980-an lagi.

Dekan SAHUSS AeU Prof Dr Juhary Ali berkata, bidang Pengurusan Pengetahuan cukup penting dalam menguruskan sesebuah organisasi apabila ia mencakupi ilmu berkaitan pengurusan kakitangan, harta intelek dan susun atur komunikasi yang bakal menambah kecekapan operasi.

"Negara Jepun misalnya, sudah mengadaptasi elemen Pengurusan Pengetahuan dalam pengurusan organisasi mereka dan hasilnya, mereka mampu bangkit bersaing dengan negara penakluk dari barat dengan cara menjaga keperluan insan dan menggalakkan inovasi dalam organisasi pada masa sama.

"Bidang ini turut menggabungkan beberapa elemen penting dalam aspek pengurusan. Ia menjadi pengajian lengkap mengenai cara mengurus serta menyeimbangkan keperluan modal insan dan keperluan organisasi. Skop yang ditawarkan melalui program ini lebih luas dan mudah diaplikasi kerana ia menyentuh secara langsung keperluan asas sesebuah organisasi," katanya.

Antara subjek yang terkandung dalam silibus pengajian pengkhususan ini termasuk Modal Insan dan Inovasi, Strategi Pengurusan Pengetahuan dan Polisi, Harta Intelek dan Pengkomersialan serta Etika dan Undang-Undang berkaitan Pe-

ngurusan Pengetahuan. Bidang ini turut menggabungkan beberapa elemen penting dalam aspek pengurusan. Ia menjadi pengajian lengkap mengenai cara mengurus serta menyeimbangkan keperluan modal insan dan keperluan organisasi"

Prof Dr Juhary Ali

Program yang ditawarkan secara separuh masa ini mendapat akreditasi penuh dari Agensi Kelayakan Malaysia (MQA) dan mengambil masa antara tiga hingga empat tahun untuk ditamatkan bergantung kepada jumlah subjek yang diambil penuntut pada setiap semester.

Uniknya pengajian di AeU adalah kaedah pembelajaran teradun di mana penyampaian ilmu melalui sesi bersemuka, perbincangan forum secara dalam talian dan nota yang dimuat naik di laman Personalised Learning Space (PLS) khusus untuk penuntut.

Sesi pembelajaran separuh masa ini juga membolehkan golongan bekerja melanjutkan pengajian sekali gus mempertingkatkan pengetahuan dari semasa ke semasa. Syarat kemasukan yang turut mengambil kira pengalaman bakal penuntut membantu merealisasikan konsep pembelajaran sepanjang hayat.

Selain Sarjana Pengurusan Pengetahuan, SAHUSS turut menawarkan program Doktor Falsafah dalam Sastera, Sarjana Sains Sosial (Penyelidikan), Sarjana Kemanusiaan dan Sastera (Penyelidikan).

Untuk maklumat lanjut mengenai AeU, lawati www.aeu.edu.my atau hubungi talian bebas tol 1-300-300-238.